



**Kelulusan Perkahwinan Bawah Umur
Mengikut Seksyen 8 Enakmen Undang-
Undang Keluarga Islam Negeri Kelantan
Tahun 2002: Analisis Kajian Kes di
Mahkamah Rendah Syariah Kota Bharu,
Kelantan**

**Family
Law**

174

***Approval of Underage Marriages under Section 8
of the Kelantan Islamic Family Law Enactment
2002: A Case Study Analysis at the Kota Bharu
Syariah Lower Court, Kelantan***

Submitted date: 3 May 2024
Revised date: 2 October 2025
Acceptance date: 6 October 2025
Available online: 30 October 2025

MUHAMMAD MUSTAQIM ROSLAN
(Corresponding Author)
ABDUL HAKIM MOHD NAHI
Jabatan Syariah
Fakulti Pengajian Islam dan Sains Sosial
Universiti Sultan Azlan Shah
33000 Kuala Kangsar, Perak, Malaysia
muhd.mustaqim@usas.edu.my
abdulhakimmohdnahi3@gmail.com

ABSTRAK

Kes perkahwinan bawah umur di negeri Kelantan kian serius akhir-akhir ini apabila terdapat sebilangan pasangan yang memohon perkahwinan sebelum mencapai tempoh minimum yang ditetapkan oleh undang-undang. Mengikut Seksyen 8 Enakmen Undang-Undang Keluarga Islam Negeri Kelantan Tahun 2002 yang telah menetapkan bahawa had minimum kebenaran perkahwinan bagi remaja lelaki adalah 18 tahun manakala remaja perempuan pula mestilah 16 tahun. Namun begitu, terdapat sebilangan kes permohonan perkahwinan di negeri Kelantan telah diluluskan di Mahkamah Rendah Syariah Kota Bharu (MRSKB) dengan Seksyen 8 ini seperti yang telah dinyatakan. Oleh yang demikian, kajian ini bertujuan menganalisis faktor-faktor kelulusan perkahwinan bawah umur mengikut Seksyen 8 Enakmen Undang-Undang Keluarga Islam Negeri Kelantan Tahun 2002. Falsafah disebalik kajian ini adalah interpretif dengan pendekatan kajian kes sebagai strategi kajian. Reka bentuk kualitatif telah diadaptasikan dalam kajian ini dengan gabungan kaedah analisis dokumen dan temu bual separa berstruktur melibatkan tiga orang hakim Mahkamah Syariah. Setelah data dokumen dan data temu bual diperolehi, kaedah analisis kandungan dokumen digunakan sekali lagi dalam proses menganalisis data-data ini yang mana hasilnya dikategorikan mengikut kaedah tematik. Dapatan menunjukkan terdapat empat faktor kelulusan perkahwinan bawah umur di MRSKB iaitu





kepatuhan amar makruf dan nahi mungkar terhadap prinsip kerajaan negeri, akibat keterlanjuran zina, bersedia dan berkemampuan dalam menguruskan keluarga serta sumbang mahram. Sehubungan dengan itu, kajian lanjutan diperlukan untuk melihat keperluan pindaan enakmen tersebut dalam penetapan had umur minimum perkahwinan di negeri Kelantan.

Kata Kunci: Enakmen Undang-Undang Keluarga Islam Negeri Kelantan Tahun 2002, Perkahwinan Bawah Umur, Faktor-Faktor Kelulusan, Perkahwinan, Undang-Undang Keluarga Islam.

ABSTRACT

The incidence of underage marriage in Kelantan has escalated recently, with several couples applying for marriage before reaching the legal minimum age. According to Section 8 of the Kelantan State Islamic Family Law Enactment 2002, which stipulates that the minimum age for marriage is 18 for boys and 16 for girls. Despite this law, there have been cases where the Kota Bharu Syariah Subordinate Court (MRSKB) has approved underage marriage applications Section 8, as stated. This study aims to analyze the factors influencing the approval of underage marriages according to Section 8 of the Kelantan State Islamic Family Law Enactment 2002. An interpretive philosophy with a case study approach was employed as the study strategy. A qualitative design was adopted, combining document analysis and semi-structured interviews with three Sharia court judges. After collecting document and interview data, a content analysis method was used to categorise the results thematically. The findings reveal four factors for the approval of underage marriages in MRSKB: compliance with the principles of *amar makruf* and *nahi munkar* by the state government, occurrences of adultery, the willingness and ability to manage a family, and cases of incest. Further research is necessary to examine the potential need for amendments to the enactment regarding the minimum marriage age in Kelantan.

Keywords: Islamic Family Law Enactment of The State of Kelantan Year 2002, Underage Marriage, Factors of Approval, Marriage, Islamic Family Law

PENGENALAN

Perkataan perkahwinan adalah ikatan sah antara pihak lelaki dan perempuan menjadi sepasang suami isteri (Kamus Dewan Bahasa dan Pustaka, 2007). Ia merupakan satu akad yang menghalalkan lelaki dan perempuan hidup bersama di samping menghalalkan hubungan persetubuhan antara mereka (Jabatan Kehakiman Syariah Negeri Kelantan, 2022). Perkataan bawah umur pula kebiasaannya diguna pakai sebagai istilah kepada kanak-kanak lelaki dan perempuan yang masih kecil (Kamus Dewan Bahasa & Pustaka, 2007). Bagi kebenaran perkahwinan bawah umur, penetapan had umur minimum orang Islam untuk perkahwinan adalah 18 tahun bagi lelaki dan 16 tahun bagi perempuan mengikut Seksyen 8 Enakmen Undang-Undang Keluarga Islam Negeri Kelantan Tahun 2002. Berbeza pula dengan Mahkamah Sivil, had umur bagi yang bukan beragama Islam diletakkan di bawah Seksyen 10 Undang-



Undang Pembaharuan Perkahwinan dan Penceraian Akta 1976 (Akta 164). Hal ini bertujuan melindungi mereka yang berumur bawah 18 tahun bagi lelaki dan 16 hingga 17 tahun bagi perempuan. Ini bermakna, seorang individu tidak dibenarkan untuk berkahwin sehingga mencapai umur yang ditetapkan dan tidak boleh melakukan akad nikah tanpa kebenaran mahkamah.

Namun begitu, jika dilihat peraturan dalam Seksyen 8 Enakmen Undang-Undang Keluarga Islam Negeri Kelantan Tahun 2002 ini, jelas menyatakan bahawa 'tidak ada perkahwinan yang boleh dijalankan di bawah peruntukan Akta ini sekiranya lelaki berumur di bawah 18 tahun atau perempuan berumur di bawah 16 tahun, melainkan dengan persetujuan bertulis daripada hakim syarie dalam keadaan tertentu (Abdul, Low & Partners, 2019). Oleh yang demikian, segala perkahwinan di bawah umur hakikatnya tidak diterima melainkan menggunakan jalan perbicaraan untuk mendapatkan budi bicara daripada pihak Mahkamah. Kebanyakan kes yang dibicarakan mempunyai sebab penerimaan yang tersendiri oleh hakim syarie dalam meluluskannya termasuklah kes-kes yang dibenarkan pernikahan bawah umur di MRSKB. Tambahan lagi, setiap kelulusan tidak sama sekali diperincikan faktornya secara spesifik mengenai pertimbangan yang perlu diambil kira dalam hal keadaan tertentu untuk memberikan kebenaran bagi pernikahan dengan pasangan bawah umur yang tidak dinyatakan dalam akta (Hashim, Ghulam Khan, Shukor & Yusof, 2019).

Sehubungan dengan itu, artikel ini dihasilkan bertujuan melihat faktor-faktor kelulusan perkahwinan bawah umur mengikut Seksyen 8 Enakmen Undang-Undang Keluarga Islam Negeri Kelantan Tahun 2002 di MRSKB, Kelantan. Kajian ini dapat memberikan penjelasan yang begitu tuntas berkaitan dengan kebenaran hakim mahkamah syarie dalam menggunakan budi bicara mereka ke atas keizinan perkahwinan bawah umur walaupun ia jelas berbeza dari enakmen undang-undang negeri. Pengkaji amat meyakini akan setiap keputusan yang dinilai hakim syarie dalam meluluskan perkahwinan bawah umur mempunyai pertimbangan dalam pelbagai aspek serta garis panduan yang telah ditetapkan oleh Mahkamah Syariah. Oleh yang demikian, secara khususnya, artikel ini akan menjawab satu persoalan sahaja iaitu, apakah faktor-faktor kelulusan perkahwinan bawah umur mengikut Seksyen 8 Enakmen Undang-Undang Keluarga Islam Negeri Kelantan Tahun 2002 di MRSKB, Kelantan?

SOROTAN KAJIAN

Sorotan kajian atau sinonim dengan *literature review* pada umumnya mengandungi kajian kepustakaan yang diambil daripada pelbagai sumber sama ada daripada buku, jurnal, prosiding, tesis, kertas projek, disertasi, makalah dan sebagainya (Darusalam & Hussin, 2016). Kajian ini telah menyoroti beberapa kajian lepas yang berlegar di sekitar skop kajian pengkaji. Kajian oleh Hazram dan Azahari (2021) melalui tajuk "*Perkahwinan Bawah Umur dari Perspektif Maqāṣid al-Sharī'at*" mendapati bahawa amalan perkahwinan bawah umur berpotensi mencapai matlamat syarak sekiranya dipatuhi syarat-syarat tertentu. Malah, dalam keadaan tertentu, perkahwinan ini dilihat sebagai mekanisme pencegahan terhadap mudarat yang lebih besar seperti zina dan kehamilan luar nikah. Walau bagaimanapun, perbahasan yang



dikemukakan lebih bersifat umum dan terbatas kepada analisis teoritikal berasaskan maqāṣid al-sharī'at, tanpa menyentuh dimensi praktikal khususnya faktor-faktor kelulusan yang dipertimbangkan oleh Mahkamah Syariah.

Sebaliknya, kajian Wan Haslinawati dan Mohd Isa (2020) memberi tumpuan terhadap realiti semasa perkahwinan kanak-kanak, bukan sahaja di Malaysia tetapi juga di beberapa negara lain. Kajian ini memperlihatkan kepelbagaian peruntukan undang-undang Islam yang digunakan dan menganalisis faktor-faktor sosio-budaya yang mendorong berlakunya perkahwinan bawah umur. Hasilnya menunjukkan keperluan sokongan sosial yang kukuh daripada ibu bapa, rakan sebaya dan masyarakat bagi mengelakkan pasangan muda daripada terperangkap dalam stigma sosial. Walaupun kajian ini lebih kontekstual berbanding Hazram dan Azahari (2021), ia masih belum menghubungkan analisis tersebut dengan data empirikal berbentuk kajian kes perundangan di Mahkamah Syariah.

Secara perbandingan, kedua-dua kajian terdahulu memberi sumbangan penting kepada wacana perkahwinan bawah umur yang mana, satu daripada dimensi normatif (maqāṣid al-sharī'at) dan satu lagi dari sudut sosiobudaya serta perundangan antara negara. Namun begitu, kedua-duanya menunjukkan keterbatasan dari segi menilai secara langsung proses dan pertimbangan kelulusan perkahwinan bawah umur di Mahkamah Syariah. Kekosongan inilah yang membuka ruang kepada kajian ini untuk meneliti faktor-faktor kelulusan secara lebih kritikal melalui analisis kes di MRSKB, Kelantan.

METODOLOGI KAJIAN

Metodologi kajian adalah merujuk kepada cara, kaedah dan pendekatan yang digunakan untuk memastikan objektif dan matlamat kajian tercapai (Roslan, 2025). Selain itu, metodologi kajian juga merujuk kepada tiga perkara asas iaitu reka bentuk kajian, kaedah pengumpulan data dan kaedah analisis data (Roslan, 2024). Pendekatan atau reka bentuk kajian yang digunakan oleh pengkaji harus sesuai dengan epistemologi Islam dan objektif kajian yang telah ditetapkan. Pengkaji boleh memilih untuk menggunakan pendekatan kuantitatif, kualitatif, atau gabungan kedua-duanya. Falsafah dari kajian berbentuk interpretif iaitu pencarian penjelasan mengenai peristiwa-peristiwa sosial atau budaya yang didasari oleh perspektif persekitaran yang sedang dikaji (Muslim, 2016). Kajian kes dipilih sebagai strategi kajian ini kerana ia membolehkan penerokaan mendalam terhadap fenomena perkahwinan bawah umur mengikut Seksyen 8 Enakmen Undang-Undang Keluarga Islam Negeri Kelantan Tahun 2002.

Reka bentuk kualitatif telah digunakan dalam kajian ini dengan gabungan teknik analisis kandungan dokumen dan temu bual soalan separa berstruktur. Melalui kaedah temu bual separa berstruktur digunakan adalah bertujuan mendapatkan maklumat yang diperlukan secara bersemuka dengan informan bagi mengenal pasti isu dan masalah kajian. Kaedah ini sangat sesuai digunakan dalam kajian ini supaya pengkaji dapat mengajukan beberapa soalan tambahan kepada informan jika persoalan



kajian tidak dapat dijawab dengan jelas (Ritchie & Lewis, 2003). Dalam konteks kajian ini, temu bual dijalankan kepada tiga orang informan yang terdiri daripada hakim dan pembantu hakim yang bertugas di MRSKB, Kelantan. Pemilihan tiga orang responden ini dipilih berdasarkan persampelan bertujuan (*purposive sampling*) yang dilihat berkemampuan untuk mencapai objektif kajian. *Purposive sampling* melibatkan pemilihan individu yang sesuai dengan kriteria yang berkaitan untuk memberikan maklumat yang relevan dan signifikan (Darusalam & Hussin, 2016).

Hasil data kajian yang telah dikumpul kemudian dianalisis menggunakan kaedah analisis tematik. Proses ini melibatkan beberapa fasa yang dimulai dengan penyaringan data. Dalam fasa ini, transkripsi rakaman audio-video diproses menjadi bentuk verbatim, iaitu ayat demi ayat atau frasa demi frasa. Setelah itu, transkrip diindeks dengan memberi kod tertentu kepada setiap informan berdasarkan transkrip mereka. Kod-kod ini membantu dalam penjanaan semula data asal serta memudahkan rujukan silang semasa penulisan dan menyiapkan laporan (Darussalam et al, 2016). Menurut Roslan (2025), terdapat lima langkah dalam mengatur analisis tematik iaitu dimulai dengan menyalin semula transkrip temu bual secara verbatim, membuat agihan soalan kajian, membuat pengkategorian awal, mencari tema dan membuat koding.

KONSEP PERKAHWINAN BAWAH UMUR

Perkahwinan kanak-kanak atau *child marriage* ialah sesuatu perkahwinan formal atau penyatuan tidak rasmi antara anak yang berumur di bawah 18 tahun dengan orang dewasa atau kanak-kanak lain yang belum mencecah usia 18 tahun (United Nations Children's Fund, 2021). Mengikut Seksyen 2 (1) Akta Kanak-Kanak 2001 menyatakan bahawa, kanak-kanak sering diertikan sebagai seseorang yang di bawah umur 18 tahun (Akta 611, Akta Kanak-Kanak 2001). Manakala menurut Ibnu Manzur (1992) perkataan bawah umur atau kanak-kanak diambil dari kata arab '*al-sighar*' sebagai sesuatu yang berlawanan dengan besar. Ia juga membawa maksud kurang saiz atau kurang umurnya. Dari sudut istilah pula, perkataan '*al-sighar*' membawa maksud sebagai suatu ciri yang dikaitkan dengan seseorang manusia semenjak kelahirannya sehinggalah baligh (Ibnu Manzur, 1992). Takrifan ini jelas menunjukkan bahawa tidak ada suatu had umur yang spesifik bagi kanak-kanak bawah umur melainkan takrifan perundangan yang telah menetapkan bahawa, kanak-kanak bawah umur adalah merujuk kepada kanak-kanak yang berumur 16 dan 18 tahun ke bawah.

Secara dasarnya, had umur minimum bagi sebuah perkahwinan orang Islam telah ditetapkan berbeza mengikut wilayah pemerintahan seperti yang dinyatakan dalam Akta, Enakmen dan Ordinan setiap negeri di Malaysia. Bagi penetapan had umur perkahwinan, negeri Kelantan dan kesemua 10 negeri yang lain masih mengekalkan undang-undang sedia ada berkaitan perkahwinan bawah umur di Malaysia. Negeri Selangor dan Kedah antara yang terkecuali apabila kerajaan negeri Selangor telah membuat Pindaan Undang-Undang Keluarga Islam 2003 (Pindaan 2018) dan Undang-Undang Keluarga Islam (Pindaan 2022) bagi negeri Kedah. Selangor merupakan negeri pertama yang telah membuat pindaan had umur berkahwin bagi orang Islam iaitu



perkahwinan seorang perempuan dari had umur 16 tahun kepada had umur 18 tahun (Zaini, 2018). Negeri-negeri lain seperti Wilayah Persekutuan masih lagi dalam pindaan undang-undang. Terdapat juga beberapa negeri bersetuju dengan cadangan pindaan had umur berkahwin kepada 18 tahun (Jiffar et. al, 2019). Dewan Undangan Negeri Kedah juga meluluskan Rang Undang-Undang tentang Enakmen Undang-Undang Keluarga Islam Kedah (Pindaan 2022) berkaitan had umur perkahwinan dan undang-undang poligami (Hamid, 2022).

Pelbagai spekulasi mula timbul apabila statistik tentang perkahwinan bawah umur di setiap negeri di Malaysia mula meningkat termasuklah di negeri Kelantan. Kelantan merupakan antara negeri yang merekodkan permohonan perkahwinan bawah umur tertinggi. Menurut Zahari (2024), daripada 546 permohonan perkahwinan bawah umur didaftarkan, hanya 13 permohonan ditolak dalam tempoh 2019 hingga 2023. Negeri Kelantan juga komited dalam menguatkuasakan bidang kuasa Mahkamah Syariah terhadap perkahwinan bawah umur mengikut Seksyen 8 Enakmen Undang-Undang Keluarga Islam Negeri Kelantan Tahun 2002. Walaupun begitu, tiada sesuatu perkahwinan boleh diakadnikahkan di bawah Enakmen ini jika lelaki itu berumur kurang daripada 18 tahun atau perempuan itu berumur kurang daripada 16 tahun kecuali jika hakim syarie telah memberi kebenarannya secara bertulis dalam hal keadaan tertentu. Oleh yang demikian, ia menimbulkan persoalan tentang apakah faktor-faktor yang menjadi garis panduan para hakim dalam budi bicara mereka terhadap kebenaran perkahwinan bawah umur ini. Sehubungan dengan itu, kajian ini menelusuri faktor-faktor kelulusan perkahwinan bawah umur mengikut Seksyen 8 Enakmen Undang-Undang Keluarga Islam Negeri Kelantan Tahun 2002 dalam sub topik seterusnya.

ANALISIS FAKTOR-FAKTOR KELULUSAN PERKAHWINAN BAWAH UMUR MENGIKUT SEKSYEN 8 ENAKMEN UNDANG-UNDANG KELUARGA ISLAM NEGERI KELANTAN TAHUN 2002 DI MAHKAMAH RENDAH SYARIAH KELANTAN

Fenomena pernikahan bawah umur di Kelantan merupakan isu hangat yang menjadi perhatian segenap masyarakat pada hari ini. Hal ini dibuktikan apabila terdapat peningkatan kes-kes permohonan pernikahan bawah umur yang semakin meningkat saban hari di MRSKB, Kelantan. Rekod mahkamah menunjukkan kebanyakan kes yang dibicarakan telah diluluskan permohonan mereka oleh para hakim bertugas atas faktor-faktor tertentu. Oleh yang demikian, ia menimbulkan persoalan tentang faktor-faktor kelulusan perkahwinan bawah umur mengikut Seksyen 8 Enakmen Undang-Undang Keluarga Islam Negeri Kelantan Tahun 2002 di MRSKB, Kelantan. Hasil kajian mendapati terdapat empat faktor kelulusan perkahwinan bawah umur di MRSKB iaitu amar makruf dan nahi mungkar terhadap prinsip kerajaan negeri, keterlanjuran zina, bersedia dan berkemampuan dalam menguruskan keluarga dan sumbang mahram. Berikut adalah dapatan umum yang telah diperoleh seperti gambar rajah di bawah:

Rajah 1: Faktor-Faktor Kelulusan Perkahwinan Bawah Umur mengikut Seksyen 8 Enakmen Undang-Undang Keluarga Islam Negeri Kelantan Tahun 2002



(Sumber: Adaptasi daripada Norizan, 2016)

Kepatuhan Amar Makruf Dan Nahi Mungkar Dalam Prinsip Kerajaan Negeri

Faktor kelulusan perkahwinan bawah umur di MRSKB yang pertama adalah disebabkan kepatuhan prinsip amar makruf dan nahi mungkar dalam prinsip kerajaan negeri. Perkataan kepatuhan bermaksud perihai patuh (menurut perintah). Manakala perkataan amar makruf dan nahi mungkar merujuk kepada perintah supaya mengerjakan perbuatan atau amalan yang baik dan menjauhi perbuatan atau amalan yang jahat. Menurut Kamus Dewan Bahasa dan Pustaka (2005), konsep amar makruf nahi mungkar berasal dari istilah yang terdapat dalam ayat al-Quran yang bermaksud "mengajak kepada kebaikan dan mencegah kemungkaran". Mengajak kepada kebaikan bermaksud mengajak manusia menuju kepada Allah supaya mentaati segala perintah Allah SWT. Sementara mencegah kemungkaran adalah usaha untuk menghalangi manusia dari melakukan perbuatan-perbuatan yang tercela (Muhammad Syafiq, 2022)

Pernikahan adalah suatu perkara yang dituntut oleh Islam bahkan perkahwinan adalah merupakan satu sunnah yang dilakukan Rasulullah SAW. Islam tidak pernah melarang umatnya dalam melakukan sesuatu perkara selagi mana ia tidak mendatangkan kemudaratan. Tambahan lagi, perkahwinan adalah sesuatu yang diharamkan oleh syarak. Sehubungan dengan itu, pendekatan ini selaras dengan peruntukan undang-undang dan hukum syarak dengan mengambil kira kemaslahatan (kepentingan) pasangan bawah umur yang akan berkahwin (Zahari, 2024). Baru-baru ini, kerajaan negeri Kelantan dikejutkan dengan cadangan perubahan had penetapan umur bagi perkahwinan yang melibatkan orang Islam. Hal yang dibangkitkan adalah membabitkan pindaan kepada Akta Undang-Undang Keluarga Islam 1984 (Akta 303) yang menetapkan umur minimum perkahwinan bagi wanita kepada 18 tahun. Walau bagaimanapun, Kelantan masih kekal dengan keputusan sebelum ini iaitu 16 tahun bagi perempuan dan 18 tahun untuk lelaki.



Tambahan pula, banyak kes yang akan timbul jika kerajaan menyukarkan sesuatu perkahwinan terutama bagi golongan bawah umur. Hal ini kerana sebahagian daripada pemohon akan menggunakan jalan singkat dengan berkahwin di sempadan negara. Perkara ini merupakan bentuk *hiyāl* dalam perkahwinan semasa iaitu perkahwinan rentas sempadan. Perkahwinan rentas sempadan didefinisikan perkahwinan yang diadakan oleh jurunikah menggunakan wali hakim di negara-negara bersempadan dengan Malaysia terutamanya di Thailand dan Indonesia (Md Said et al., 2020). Oleh yang demikian, perkara ini akan memberikan kesan kepada individu jika pihak kerajaan dan mahkamah menyukarkan proses pernikahan bawah umur di Kelantan khususnya. Menurut Ahmad Sarkawi (2024), hampir 300 pasangan dari Malaysia menikah di Selatan Thailand setiap bulan. Menerusi jumlah yang dinyatakan, 60 peratus perkahwinan itu melibatkan mereka yang berpoligami dan selebihnya kerana tidak mendapat izin keluarga termasuk bernikah dengan pasangan di negara ini.

Tambahan lagi, menurut Zahari (2024) Tatacara pengendalian piawai atau standard operating procedure (SOP) yang minimum atau bersifat lebih memudahkan oleh Jabatan Kehakiman Syariah Negeri Kelantan khusus untuk negeri ini dengan mengambil kira lokaliti Kelantan yang bersempadanan dengan Thailand. Ini bagi mengelakkan berlakunya nikah di negara berkenaan, tanpa kebenaran wali atau akad sendiri. Menurut Zahari (2024), kerajaan tidak boleh menyekat perkahwinan tetapi dengan undang-undang yang sedia ada boleh membantu untuk mengawal daripada berlakunya lambakan pasangan bawah umur berkahwin di negara Thailand. Bahkan, mahkamah juga boleh menutup terus permohonan tetapi menyekat perkahwinan akan membawa kesan yang lebih besar kepada masyarakat. Pihak mahkamah tidak mahu generasi muda terikut dengan budaya menikah di sempadan negara kerana risiko akan timbul dikemudian hari.

Tuntasnya, pelbagai permasalahan akan timbul jika terjadinya situasi menikah di sempadan negara. Antara kesan yang timbul adalah perbuatan tersebut akan menyukarkan proses membuat sijil kelahiran anak di Jabatan Pendaftaran Negara (JPN). Selain itu, ia juga akan menyukarkan sebarang tuntutan harta di mahkamah. Proses tuntutan harta termasuk harta sepencarian dan harta pusaka akan menjadi sukar dan mereka yang menjadi mangsa sudah tentu wanita apabila gagal mendapatkan hak di mahkamah (Kadir, 2024). Oleh itu, kerajaan negeri Kelantan sentiasa memandang serius terhadap masalah perkahwinan bawah umur ini. Pihak mahkamah juga perlu mengambil kira dari pelbagai sudut dengan menjalankan kepatuhan amar makruf dan nahi mungkar terhadap prinsip kerajaan negeri.

Keterlanjuran Zina

Faktor lain bagi kelulusan pernikahan bawah umur adalah akibat keterlanjuran zina. Menurut Kamus Dewan Bahasa dan Pustaka (2005), keterlanjuran adalah melakukan perkara yang salah tanpa rasa bersalah ke atas dirinya. Manakala Istilah zina pula membawa maksud persetubuhan yang tidak sah atau haram (bukan antara suami isteri) (Kamus Dewan Bahasa & Pustaka, 2005). Dalam Islam, zina terbahagi kepada



dua iaitu *muhsan* dan *ghayr muhsan*. Maksud perkataan *muhsan* adalah merujuk kepada pelaku zina yang dilakukan oleh orang yang sudah baligh, berakal, merdeka, dan sudah pernah bersetubuh dalam akad nikah yang sah. Dengan kata lain, zina *muhsan* adalah zina yang pelakunya sudah menikah. Sedangkan zina *ghayr muhsan* adalah zina yang dilakukan oleh orang yang belum pernah melangsungkan perkawinan sah (Awdah, 2000)

Mengikut statistik yang dikeluarkan oleh Polis Diraja Malaysia (PDRM), kes jenayah zina adalah yang paling banyak berlaku dalam masyarakat kini. Kesannya telah menimbulkan kes-kes jenayah lain seperti pembuangan bayi, sumbang mahram, pengguguran janin, kelahiran anak tidak sah taraf dan sebagainya. PDRM merekodkan sebanyak 577 kes pembuangan bayi bagi tahun 2014 sehingga 2018. Antara punca pembuangan bayi adalah kehamilan luar nikah dan kehamilan remaja (Berita Harian, 2019). Dikhabarkan sejak 2013 kira-kira 100,000 kes remaja perempuan hamil bawah umur 19 tahun dilaporkan. Terdapat kira-kira 900 kes pembuangan bayi dilaporkan bagi tempoh sama. Daripada 900 kes pembuangan bayi yang dilaporkan, hanya 30 peratus daripada jumlah bayi itu masih bernyawa (Sinar Harian, 2019). Oleh yang demikian, kesemua kes yang dinyatakan adalah satu kes yang sama tetapi berbeza dari sebutannya. Menurut Ismail (2019) zina antara gejala sosial yang amat menakutkan yang pernah dilakukan oleh umat terdahulu dan juga pada zaman jahiliyah sehingga berleluasa dewasa ini.

Oleh yang demikian, isu zina merupakan salah satu sebab hakim meluluskan perkahwinan bawah umur. Terdapat ramai pemohon yang mengemukakan permohonan perkahwinan bawah umur disebabkan keterlanjuran zina. Mereka telah melakukan zina sebelum sah bergelar suami isteri (Zahari, 2024). Tambahan lagi, terdapat satu penemuan kes di MRSKB yang berdaftar bil: 2401-L0203-111-0125 dan pemohon merupakan seorang wanita yang baru berusia 15 tahun telah hamil sebelum menikah. Hal ini menjadi salah satu sebab perkahwinan mereka diluluskan. Menurut Zahari (2024), kebanyakan daripada pemohon yang hadir telah terlanjur zina dan ada diantara mereka yang telah hamil.

Jika mahkamah tidak meluluskan perkahwinan, maka bayi akan lahir tanpa ketiadaan seorang ayah. Mengenai permasalahan terlanjur zina ini, Md. Said (2018) menyatakan terdapat juga kes perkahwinan bawah umur disebabkan faktor-faktor seperti hamil luar nikah, terlanjur dan telah melahirkan anak. Justeru itu, permohonan bagi perkahwinan bawah umur juga merupakan satu inisiatif untuk menebus kesalahan yang dilakukan oleh pasangan yang telah terlanjur. Oleh itu, pihak mahkamah tidak bermudah-mudah dalam cuba mempertimbangkan hal tersebut kepada pelaku zina bawah umur. Perbuatan zina ini perlu ditangani dengan baik melalui usaha pencegahan iaitu *wiqayah* atau dengan menutup semua jalan *sadd al-dharai'* untuk mencegah pelbagai perbuatan-perbuatan yang lebih teruk berlaku.

Mengizinkan perkahwinan bawah umur adalah dituntut jika ia mampu mengelakkan keburukan yang lebih teruk berlaku. Hal ini sangat penting jika dilihat dalam hadis Rasulullah SAW untuk menutup segala mudarat. Rasulullah SAW bersabda:



Tidak boleh melakukan perbuatan yang mudarat dan tidak boleh memudaratkan orang lain.

(Riwayat Ibn Majah, No hadis, 2341)

Melalui hadis ini, Imam Ibn Daqiq al-'Id (1986) menyebut, bahawa al-Mahasini berkata, "Yang dimaksudkan dengan merugikan adalah melakukan sesuatu yang bermanfaat bagi dirinya, tetapi menyebabkan orang lain mendapatkan mudarat". Oleh itu, jelas menunjukkan bahawa peranan mahkamah adalah sebagai pihak yang memberikan manfaat dan mengurangkan mudarat kepada orang lain dalam menangani permasalahan zina ini.

Bersedia dan Berkemampuan dalam Menguruskan Keluarga

Faktor kelulusan perkahwinan bawah umur seterusnya adalah pasangan bawah umur yang sudah bersedia dan berkemampuan dalam menguruskan keluarga. Menurut Kamus Dewan Bahasa dan Pustaka (2005), bersedia bermaksud bersiap untuk melakukan sesuatu. Manakala istilah berkemampuan pula membawa maksud mempunyai kesanggupan kebolehan dan kekuatan. Menurut para ulama, kemampuan selalu didefinisikan dengan *solahuyyatuhu Li wujub al-huquq al-masyru'ah lahu wa 'alayh*, iaitu kesanggupan seseorang untuk menerima hak-hak dan memenuhi kewajipan-kewajipan yang diberikan syarak (Al-Rahawi, 1993). Maka, setiap orang yang akan berumah tangga diminta kemampuannya secara utuh. Menurut bahasa Arab "kemampuan" disebut *ahlun* yang bermaksud "layak dan pantas" (Ash-Shiddieqy, 1975).

Para mujtahid telah sepakat bahawa nikah adalah suatu ikatan yang dianjurkan syariat. Bagi orang yang sudah berkeinginan untuk nikah dan khawatir terjerumus ke dalam perbuatan zina, sangat dianjurkan untuk melaksanakan nikah. Demikian adalah menurut kesepakatan para imam mazhab (Hasyimi, 2015). Terdapat juga dalam sebuah hadis riwayat Bukhari dan Muslim, yang menyatakan galakan dalam bernikah, maksudnya:

Wahai para pemuda! Sesiapa di antara kamu telah mampu (pembiayaan) berkahwin, maka bernikahlah. Kerana nikah itu dapat menundukkan mata dan memelihara faraj (kelamin). Dan sesiapa yang belum mampu, maka hendaklah berpuasa kerana puasa itu dapat menjadi perisai baginya (dalam membendung syahwat).

(Riwayat al-Bukhari, No Hadis 5065; Muslim, No Hadis 3466)

Melalui hadis yang dinyatakan, Imam Nawawi (2022) menjelaskan apabila seseorang itu berkemampuan dari sudut kewangan serta *jima'*, maka dianjurkan supaya berkahwin kerana perkahwinan tersebut mampu untuk menundukkan mata dan memelihara faraj. Sekiranya seseorang masih lagi tidak berkemampuan dari segi kewangan dan *jima'* maka dianjurkan untuk berpuasa kerana mampu menjadi benteng dan perisai daripada syahwat.



Oleh itu, faktor pasangan bawah umur yang sudah bersedia dan berkemampuan dalam menguruskan keluarga akan sentiasa diberi tempat dalam meluluskan pernikahan bawah umur. Walaupun disebut mampu, kebiasaannya pihak mahkamah atau hakim yang dilantik akan melihat dari pelbagai sudut sebelum meluluskannya. Antara yang dilihat adalah, perkahwinan ini tiada unsur paksaan, suka sama suka, tiada halangan dan berkemampuan terhadap harta (Zahari, 2024). Selain itu, menurut Mohamed (2023), kemaslahatan perkahwinan pasangan bawah umur akan dinilai melalui penelitian menyeluruh merangkumi aspek kerelaan pasangan dan kesediaan mendirikan rumah tangga seperti kemampuan, emosi, fizikal, mental, seksual, sosial, spiritual, kesihatan, pendidikan, sekufu dan sebagainya.

Selain itu, menurut Zahari (2024), kemaslahatan perkahwinan pasangan bawah umur perlu dinilai melalui penelitian menyeluruh daripada aspek kerelaan pasangan dan kesediaan mendirikan rumah tangga. Terdapat beberapa kes mal di MRSKB didaftarkan iaitu bil: 2401-L0203-111-0150 dan 2404-L0203-111-0505 yang diluluskan oleh hakim mahkamah. Kedua-dua kes tersebut telah mendapat persetujuan kedua belah pihak keluarga. Bahkan, mereka sanggup untuk menyara pasangan bawah umur tersebut walaupun masih bersekolah dan tiada pendapatan tetap dalam menguruskan perbelanjaan. Menurut Zahari (2024), soal kemampuan juga diambil kira kerana ia berkait rapat dengan kekuatan sokongan, persediaan awal oleh ibu bapa, kematangan dalam membuat keputusan dan keupayaan melaksanakan peranan sebagai ibu bapa.

Terdapat juga syarat lain terhadap pasangan yang ingin bernikah. Pihak pemohon perlu menghadirkan ibu bapa sebagai syarat penerimaan ketika sesi perbicaraan berlangsung. Menurut Siti Nur Muzliana (2024), sebelum akad nikah dijalankan, permohonan dikemukakan kepada Mahkamah Syariah dan hanya hakim syarie yang mempunyai autoriti untuk meluluskan permohonan melalui sesi perbicaraan dalam kamar secara tertutup melibatkan keterangan pemohon bawah umur, ibu bapa pemohon, saksi dan imam setempat atau Penolong Pendaftar Nikah Cerai Rujuk (Zahari, 2024). Salah satu rukun asas untuk mengesahkan sesebuah perkahwinan adalah keizinan perkahwinan daripada wali bakal pengantin perempuan (al-Syirbini, 1994). Keizinan ini adalah perlu kerana perempuan merupakan golongan yang lemah dan sentiasa berhajat kepada layanan dan pimpinan daripada kaum lelaki. Oleh yang demikian, setiap kelulusan mahkamah dalam meluluskan sebarang perkahwinan perlulah didatangkan dengan wali yang sah. Hadirnya wali adalah satu jalan dan bukti yang kukuh untuk hakim meluluskan sebarang permohonan perkahwinan pasangan bawah umur. Pihak mahkamah juga tidak sewenang-nya meluluskan permohonan yang tidak mengikut syarat yang ditetapkan. Walaupun telah jelas tertulis dalam enakmen peruntukan negeri-negeri, hakim tidak teragak-agak untuk menolak atau membatalkan perkahwinan yang tidak mengikut syarat-syarat yang ditetapkan.



Sumbang Mahram

Faktor kelulusan yang terakhir adalah perbuatan sumbang mahram. Perkataan sumbang mahram diertikan sebagai suatu perbuatan atau perlakuan zina yang berlaku antara dua orang anggota terdekat dalam sesebuah keluarga. Sebagai contoh, antara abang dengan adik perempuan atau ayah dengan anak perempuannya (Kamus Dewan Bahasa & Pustaka, 2005). Menurut Enakmen Jenayah Syariah (1992), perkataan sumbang membawa erti suatu perbuatan atau siri perbuatan yang bertentangan dengan hukum syarak antara seorang lelaki dengan seorang perempuan yang ditegah berkahwin. Selain itu, sumbang mahram atau inses (*incest*) adalah perhubungan seksual antara seorang lelaki dengan cucu perempuan, anak perempuan, kakak, adik perempuan atau ibunya atau antara seorang perempuan yang berumur 16 tahun atau lebih dengan datuk lakinya, bapa, abang, adik lelaki atau anak lakinya dengan kerelaan dan keizinan kedua-dua pihak terbabit (Azizah & Azelin, 2004).

Dalam konteks kehidupan di Malaysia, kesedaran tentang sumbang mahram sangat penting untuk menjaga batasan-batasan yang ditetapkan oleh Islam. Beberapa individu telah dilaporkan terjerumus dalam salah laku sumbang mahram yang berlaku di MRSKB. Hal ini terjadi apabila terdapat pemohon yang hadir ke mahkamah membuat permohonan perkahwinan bawah umur. Apabila dilihat berdasarkan borang permohonan, pemohon merupakan seorang wanita yang pernah dirogol oleh bapanya sendiri (Siti Nur Muzliana, 2024). Tambahannya lagi, sumbang mahram adalah satu jenayah yang berada di bawah kesalahan jenayah rogol.

Bagi pensabitan kesalahan, Mahkamah Syariah tidak ada kuasa dalam menjatuhkan hukuman terhadap mangsa kerana ia dipaksa tanpa kerelaan. Mangsa juga hadir ke mahkamah tanpa ditemani tertuduh iaitu ayahnya. Oleh itu, kesalahan sumbang mahram sering disabitkan dan dihukum di bawah seksyen 376(2)(d) dan (e) terpakai melibatkan hukuman penjara sekurang-kurangnya 5 tahun sehingga 30 tahun beserta hukuman sebatan iaitu seksaan bagi kesalahan rogol (Zahari, 2024). Justeru itu, kebiasaannya pihak mahkamah akan meluluskan permohonan mereka yang teraniaya akibat perbuatan sumbang mahram ini. Mahkamah juga akan menggalakkan yang tertuduh untuk mendapatkan rawatan bimbingan kaunseling di Jabatan Agama Negeri jika perlu.

Kelulusan hakim dalam meluluskan kes ini adalah sangat penting dan perlu diteliti dari sudut pandang yang mendalam. Oleh yang demikian, dalam meluluskan kes sumbang mahram terhadap pemohon bawah umur adalah wajar. Hal ini menjelaskan bahawa pengadilan di Mahkamah Syariah didasarkan pada prinsip-prinsip hukum Islam dan undang-undang Islam yang berlaku di Malaysia. Oleh kerana itu, dalam membela golongan yang teraniaya ini, Mahkamah Syariah akan merujuk kepada hukum dan ajaran Islam untuk memberikan keputusan yang sesuai dengan prinsip-prinsip agama. Hakikatnya, Allah SWT telah menjelaskan yang maksudnya:



Allah menghendaki kamu beroleh kemudahan, dan Ia tidak menghendaki kamu menanggung kesukaran.

(Al-Baqarah 2:185)

Menurut Ummah (2017), sekiranya dilakukan tanpa menimbulkan sebarang masalah atau kesukaran terhadap orang yang melaksanakannya, memandangkan tiada sebab yang mengharuskan keringanan hukum pada saat sedemikian. Justeru itu, kewajaran mahkamah dalam membenarkan perkahwinan mangsa dengan pihak ketiga iaitu bukan mahramnya akibat sumbang mahram bawah umur sangat bertetapan dengan kehendak dan kepatuhan syarak. Justeru, hal ini dapat menyelamatkan mereka yang terlibat dari terus rosak dihanyut dosa tanpa sebarang pembelaan.

KESIMPULAN

Tuntasnya, negeri Kelantan telah menetapkan bahawa had minimum kebenaran perkahwinan bawah umur bagi remaja lelaki adalah 18 tahun manakala remaja perempuan pula mestilah mencapai 16 tahun. Segala perkahwinan bawah umur hakikatnya tidak diterima melainkan menggunakan jalan perbicaraan untuk mendapatkan budi bicara daripada pihak mahkamah. Kebanyakan kes yang dibicarakan mempunyai sebab penerimaan yang tersendiri oleh hakim syarie dalam meluluskannya termasuklah kes-kes yang dibenarkan pernikahan bawah umur di MRSKB. Oleh yang demikian, ia menimbulkan persoalan tentang apakah faktor-faktor yang menjadi garis panduan para hakim dalam budi bicara mereka terhadap kebenaran perkahwinan bawah umur ini. Dapatan menunjukkan terdapat empat faktor kelulusan perkahwinan bawah umur di MRSKB iaitu kepatuhan amar makruf dan nahi mungkar terhadap prinsip kerajaan negeri, keterlanjuran zina, kesediaan dan kemampuan dalam menguruskan keluarga dan sumbang mahram. Hal ini menunjukkan bahawa para hakim mempunyai sebab dan alasan yang munasabah mengikut prinsip maqasid syariah untuk memelihara lima perkara iaitu memelihara agama, nyawa, akal, keturunan dan harta. Sehubungan dengan itu, kajian lanjutan diperlukan untuk melihat keperluan pindaan enakmen tersebut dalam penetapan had umur minimum perkahwinan di negeri Kelantan.

RUJUKAN

'Awdah, A. A. (2000). *Al-Tasyri' Al-Jina'i Al-Islam: Muqaranan Bi-Al-Qanun Al-Wadi'i*. Mu assasah al-risalah.

Akta Kanak-Kanak 2001: *Kesannya Terhadap Undang-Undang Keluarga - [2002] JMCL 1; (2002) 29 Journal of Malaysian and Comparative Law 1. (n.d.)*.
<http://www.commonlii.org/my/journals/JMCL/2002/1.html>

Al-Nawawī, Mahy al-Din Abi Zakaria Yahya Bin Syarf (2022) *ṣahih Muslim bi Syarḥ alNawawī*, Beirut: Dār al-Kutub al-Ilmiyyah.



- Al-Rahawi. (1315H/1993). *Syarh al-Manar wa Khawasyih min 'Ilm al-Ushul*, Mesir: Dar al-Sa'adah.
- Al-Syirbini, Syams al-Din Muhammad ibn Muhammad al-Khatib., (1994), *Mughni al-Muhtaj ila Ma'rifah Ma'ani Alfaz al-Minhaj*, Jil. 5, Beirut: Dar al-Kutub al-'Alamiyyah.
- Ash-Shiddieqy, T. H. (1975). *Pengantar Hukum Islam Jilid II / oleh T.M. Hasbi Ash-Shiddieqy*, 1975(1975), 1–99. <http://library.um.ac.id/free-contents/index.php/buku/detail/pengantar-hukum-islam-jilid-ii-oleh-t-m-hasbi-ash-shiddieqy-11206.html>
- Astro Awani. 533 pasangan bawah umur nikah di Kelantan. (2023, November 28). <https://www.astroawani.com/berita-malaysia/533-pasangan-bawah-umur-nikah-di-kelantan-447869>
- Azizah Othman & Azelin Aziz. (2004). *Fenomena Sumbang Mahram Di Kalangan Masyarakat Islam di Malaysia. Universiti Utara Malaysia. Laporan Penyelidikan Akademik. Universiti Utara Malaysia.*
- Bernama. (2019, May 10). 100,000 kes remaja hamil dilaporkan sejak 2013. Sinar Harian. <https://www.sinarharian.com.my/article/27518/berita/nasional/100000-kes-remaja-hamil-dilaporkan-sejak-2013>
- Carian umum. (n.d.). <https://prpm.dbp.gov.my/cari1?keyword=kahwin> –
- Darusalam, G. & Hussin, S. (2016). *Metodologi Penyelidikan Dalam Pendidikan*. Kuala Lumpur: Penerbit Universiti Malaya.
- Hamid, N. H. (2022, July 18). *Kedah naikkan had umur kahwin kepada 18 tahun*. Sinar Harian. <https://www.sinarharian.com.my/article/211862/edisi/keдах-naikkan-had-umur-kahwin-kepada-18-tahun>
- Hasnizam Hashim, Intan Nadia Ghulam Khan, Haliza a. Shukor, & Nabilah Yusof. (2019). *Perkahwinan Bawah Umur Menurut Perspektif Undang-Undang Jenayah Islam Dan Undang-Undang Sivill Di Malaysia. 5th Muzakarah Fiqh & International Fiqh Conference*. https://conference.uis.edu.my/mfifc/images/E-Proceeding-2019/08-Kahwin_bawah_umur-Hasnizam_Hashim.pdf
- Hazram N. A, & Azahari R. (2021). *Perkahwinan Bawah Umur dari Perspektif Maqāsid al-Sharī'ah*. *Journal of Contemporary Islamic Law*, (2021) Vol. 6(2): 32-42. <https://journalarticle.ukm.my/18240/1/JCIL-2021-62-Article-4.pdf>
- Ibnu Manzur. (1992). *Lisan al-Arab*. Lubnan: Dar al-Sadir.



- Ismail, I. S. (2019, June 28). Kes pembuangan bayi serius - TPM. *Berita Harian*.
<https://www.bharian.com.my/berita/nasional/2019/06/578922/kes-pembuangan-bayi-serius-tpm>
- Jabatan kebajikan masyarakat. (n.d.).
<https://www.jkm.gov.my/jkm/index.php?r=portal/left&id=VEliZUhrbWc2VC9wM3hEVWxTWVVFdz09>
- Jasmi, D. N. K., Ibrahim, A. Q., Rahman, R. A., & Noh, N. C. (2020). Peranan dan cabaran Jabatan Hal Ehwal Agama Islam Negeri Sabah (JHEAINS) dalam menangani isu sumbang mahram di Sabah. *Asian Journal of Civilizational Studies*, 2(3), 31–41. <http://ajocs.com/index.php/ajocs/article/download/46/35>
- Jiffar, S., Amran, S. N. M. E. & Zainuddin, M. Z. (2019). Had umur perkahwinan: Kedah setuju pinda, Kelantan kekal, Sabah cari jalan atasi. *BH Online*.
<https://www.bharian.com.my/berita/nasional/2019/11/631143/had-umur-perkahwinan-kedahsetuju-pinda-kelantan-kekal-sabah-cari>
- Kadir, F. A. (2024, February 25). *Kahwin di sempadan mudah, tapi boleh jadi mudarat*. *Sinar Harian*.
<https://www.sinarharian.com.my/article/651362/suara-sinar/analisis-sinar/kahwin-di-sempadan-mudah-tapi-boleh-jadi-mudarat>
- Md Said, M. H., Md Hashim, N., Abdul Hak, N., Che Soh@Yusoff, R., Ahmad Fuzi, F. H., & Yaakob, K. (2020). Kajian Sosioperundangan Perkahwinan Merentasi Sempadan Di Nusantara. *Journal of Nusantara Studies (JONUS)*, 5(2), 129-151.
- Mohamed, M. (2023, November 28). *533 pasangan di Kelantan kahwin bawah umur*. *Kosmo Digital*.
<https://www.kosmo.com.my/2023/11/28/533-pasangan-di-kelantan-kahwin-bawah-umur/>
- Muhammad Syafiq Din. (2022). Pelaksanaan Konsep Amar Makruf Nahi Mungkar Dalam Persatuan Pengguna Islam Malaysia (PPIM). *Jurnal Pengajian Islam*, Vol. 15(1).
<https://jpi.kuis.edu.my/index.php/jpi/article/download/161/121/290>
- Norizan Yusof. (2016). Pengurusan Elemen Psikologikal sebagai Persediaan Menghadapi Bencana: Satu Kajian Kualitatif Terhadap Mangsa Banjir di Kelantan. *Jurnal Psikologi Malaysia*, 30(2), 74-81
- Roslan, M (2024). *Kaedah Pentaksiran Bilik Darjah (PBD) dan Kesannya Kepada Murid Tahap Satu: Analisis Subjek Pendidikan Islam/ Classroom Assessment Method (PBD) And Its Impact On Level One Pupils: Analysis Of Islamic Education Subjects*. *UMRAN*, 11(1), 63–78. <https://doi.org/10.11113/umran2024.11n1.678>
- Roslan, M. (2025). Masalah Tekanan Emosi Terhadap Penamaan Nasab Anak Tak Sah Taraf kepada Abdullah: Analisis Fatwa Kebangsaan. *Al-Takamul Al-Ma'rifi*, 8(1),



10–20. Retrieved from:
<https://jurnal.usas.edu.my/altakumul/index.php/altakumulfiles/article/view/317>

Roslan, M. M, Nasaruddin, N. F. (2025). Kesan Positif Selepas Perceraian: Analisis Kualitatif Kesedaran Hak dalam Kalangan Isteri yang Telah Bercerai/ Positive Impact After Divorce: A Qualitative Analysis of Rights Awareness Among Divorced Wives. *UMRAN – Journal of Islamic and Civilizational Studies*, 12(1), 61-74. <https://doi.org/10.11113/umran2025.12n1.725>

Roslan, M. M. (2024). Metodologi Pendalilan terhadap Fatwa Pensabitan Nasab Anak Tak Sah Taraf di Malaysia: Analisis Penamaan kepada Bapa Biologi: [Argument Methodology Against Fatwa Conviction of Illegitimate Children's Lineage in Malaysia: Analysis of The Name of The Biological Father]. *KQT EJurnal*, 4(2), 1–19. Retrieved from: <http://ejurnal.kqt.edu.my/index.php/kqt-ojs/article/view/90>

Roslan, M. M., & A Aziz, M. A. (2025). Gejala Kemurungan Akibat Pembubaran Pernikahan Syubhah: Analisis Kajian Kes: [Depression Symptoms Resulting from Doubtful Marriage Dissolution: A Case Study Analysis]. *KQT EJurnal*, 5(1), 1–19. Retrieved from: <http://ejurnal.kqt.edu.my/index.php/kqt-ojs/article/view/98>

Saim, N. J., Lejem, S., Abdullah, F., & Akhid, N. M. (2018). Perkahwinan Remaja: Satu Kajian di Kuching, Sarawak. *Jurnal Psikologi Malaysia*, 32(3), 47-61 <http://journalarticle.ukm.my/14944/>

Seksyen 8. *Umur minimum untuk perkahwinan. (Enakmen Undang-Undang Keluarga Islam 2002 - Enakmen 6 Tahun 2002)*. (n.d.). http://www2.esyariah.gov.my/esyariah/mal/portalv1/enakmen/State_Enact_Orinfs/100ae747c72508e748256faa00188094/d8924d18e829c4344825712600099de6?OpenDocument

Siti Nur Muzliana Majid (2024). Temu bual peribadi. Pembantu Hakim Syarie Mahkamah Tinggi Syariah Kelantan.

Ummah, A. K. (2017). *Gratifikasi dalam al-qur'an menurut Ahmad Mustafa Al-Maraghi dalam Tafsir Al-Maraghi*. <https://repository.uinjkt.ac.id/dspace/bitstream/123456789/37510/2/ANIS%20KHOIRU%20UMMAH-FU.pdf>

Undang-undang Keluarga Islam (Wilayah-WilayahPersekutuan) 1984 (Akta 303).

UNICEF. (2021). The Convention on the Rights of the Child: The children's version. <https://www.unicef.org/child-rightsconvention/convention-text-childrens-version>

User, S. (n.d.). *Perkahwinan*. <https://syariah.kelantan.gov.my/index.php/pustaka-media/perkahwinan>



The current issue and full text archive of this journal is available at
<https://muwafaqat.uis.edu.my/index.php/journal>

Zahari Mohd Yusoff (2024). Temu bual peribadi. Hakim Syarie Mahkamah Tinggi Syariah Kelantan.

Zaini, S. M. (2018, December 11). Selangor negeri pertama pinda had umur perkahwinan. *Berita Harian*.
<https://www.bharian.com.my/berita/kes/2018/12/508025/selangor-negeri-pertama-pinda-had-umur-perkahwinan>